

四庫全書

集部

欽定四庫全書

集部

石倉歷代詩選卷六十一

詳校官廉吉士臣范逢恩

侍讀臣孫球覆勘

總校官進士臣朱鈐

校對官主事臣張慎和

謄錄監生臣周鴻

欽定四庫全書

石倉歷代詩選卷六十一

明 曹學佺 編

中唐十五

白居易

字樂天
太原人

夢仙

人有夢仙者夢身升上清坐乘一白鶴前引雙紅旌羽
衣忽飄飄玉鸞俄錚錚半空直下視人世塵冥冥漸失

鄉國處纔分山水形東海一片白名岳五點青須臾羣
仙來相引朝玉京安期羨門輩列侍如公卿仰謁玉皇
帝稽首前致誠帝言汝仙才努力勿自輕却後十五年
期汝不死庭再拜受斯言既寤喜且驚祕之不敢泄誓
志居巖扃恩愛捨骨肉飲食斷膾腥朝餐雲母散夜吸
沆瀣精空山三十載日望輜輶迎前期過已久鸞鶴無
來聲齒髮日衰白耳目減聰明一朝同物化身與糞壤
并神仙信有之俗力非可營苟無金骨相不列丹臺名

悲哉夢仙人一夢誤一生

廢琴

絲桐合為琴中有太古聲古聲淡無味不稱今日情玉
徽光彩滅朱絃塵土生廢棄來已久遺音尚泠泠不辭
為君彈縱彈人不聽何物使之然羌笛與秦箏

雜興

楚王多內寵傾國選嬪妃又愛從禽樂馳騁每相隨錦
繡臂花隼羅袂控金羈遂習宮中女皆如馬上兒色禽

合為荒刑政兩已衰雲夢春仍獵章華夜不歸東風二
月天春鴈正離離美人挾銀鏑一發疊雙飛飛鴻驚斷
行斂翅避蛾眉君王顧之笑弓箭生光輝楚國有夫人
其名曰樊姬當時諫獵語至今猶足思

其二

越國政初荒越天旱不已風日燥水田水涸塵飛起國
中新下令官渠禁流水流水不入田壅入王宮裏餘波
養魚鳥倒影浮樓雉澹灩九折池縈迴十餘里四月芟

荷發越王日遊喜左右好風來香動芙蓉藥但愛芙蓉
香又種芙蓉子不念閭門外千里稻苗死

其三

吳王心日侈服玩盡奇瓌身卧翠羽帳手持紅玉杯行
動自矜顧數步一徘徊小人知所好西施自越來奸邪
得藉手從此倖門開古稱國之寶勇士與賢才今看君
王眼視之如塵灰伍員諫已死浮屍去不回姑蘇臺下
草麋鹿闔生麋

蜀路石婦

石傍一石婦無記亦無銘傳是此鄉女為婦孝且貞十五嫁邑人十六夫征行夫行二十載婦獨守孤茆翁姑老且病轉側不安寧此婦執婦道一一如禮經晨昏問起居恭順發心誠樂餌自調節膳羞必甘馨夫行竟不起婦德彌光明後人高其節刻石象婦形儼然整衣巾若立在閨庭似見舅姑禮如聞環珮聲至今為婦者見此孝心生不比山頭石空有望夫名

初入太行路

天冷日不光太行峰蒼莽嘗聞此中險今我方獨往馬
蹄凍且滑羊腸不可上若比世路難猶自平于掌

送王處士

王門豈無酒侯家豈無肉主人貴且驕待客禮不足望
塵而拜者朝夕走碌碌王生獨拂衣遐舉如雲鵠寧歸
白雲外飲水卧空谷不能隨衆人斂手低眉目扣門與
我別沽酒留君宿好去采薇人終南山正綠

寄隱者

賣藥向都城行憩青門樹道逢馳驛者色有非常懼親
族走相送欲別不敢住私怪問道傍何人復何故云是
右丞相當國握樞務祿厚食萬錢恩深日三顧昨日延
英對今日崖州去由來君臣間寵辱在朝暮青青東郊
草中有歸山路歸去卧雲人謀身計非誤

廬山桂

偃蹇月中桂結根依青天風繞月起吹予下人間飄

零委何處乃落匡廬山生為石上桂葉如剪碧鮮枝幹
日長大根莖日牢堅不歸天上月空老山中年廬山去
咸陽道里三四千無人為移植得入上林園不及紅花
樹長栽溫室前

湓浦竹

潯陽十月天天氣仍溫燠有霜不殺草有風不落木玄
冥氣力薄草木冬猶綠誰肯湓浦頭迴眸看修竹其有
顧盼者持刀斬且束剖劈青琅玕家家蓋墻屋吾聞汾

金剛經
卷六十一
晉間竹少重如玉胡為貶聲價生此西江曲

東林寺白蓮

東林北塘水湛湛見底清中生白芙蓉苗苗三百莖白
日發光彩清飈散芳馨披香珠囊破瀉露玉盤傾我慙
塵埃眼見此瓊瑤英乃知紅蓮花虛得清淨名夏萼敷
未歇秋芳結纔成夜深衆僧寢獨起繞池行欲收仙顆
子寄向長安城但恐出山去人間種不成

續古詩

戚戚復戚戚送君遠行役行役非中原海外黃沙磧伶
俜獨居妾迢遞長征客君望功名歸妾憂生死隔誰家
無夫婦何人不離拆所恨薄命身嫁遲別日迫妾身有
存沒妾心無改易生為閨中婦死作山頭石

其二

掩淚別鄉里飄飄將遠行茫茫綠野中春盡孤客情驅
馬上丘隴高低路不平風吹棠梨花啼鳥時一聲古墓
何代人不知姓與名化作路傍土年年春草生感彼忽

自悟今我何營營

其三

栖栖遠方士讀書三十年業成無知己徒步來入關長
安多王侯英俊競攀援幸隨衆賓末得厠門館間東閣
有旨酒中堂有管絃何為向隅客對此不開顏富貴無
是非主人終日歡貧賤多悔尤客子終夜歎歸去復歸
去故鄉貧亦安

其四

春旦日初出曛曛耀晨輝草木照未遠浮雲已蔽之天
地黯似晦當午如昏時雖有東南風力微不能吹中園
何所有滿地青青葵陽光委雲上傾心欲何依

傷友

陋巷孤寒士出門苦栖栖雖云志氣在豈免顏色低平
生同門友通籍在金閨曩者膠漆契邇來雲雨睽正逢
下朝歸軒騎五門西是時天久陰三日雨淒淒蹇驢避
路立肥馬當風嘶迴頭忘相識占道上沙堤昔年洛陽

社貧賤相提携今日長安道對面隔雲泥近日多如此
非君獨慘悽

致仕

七十而致仕禮法有明文何乃貪榮者斯言如不聞可
憐八九十齒墮雙眸昏朝露貪名利夕陽憂子孫掛冠
顧翠綵懸車惜朱輪金章腰不勝偃僂入君門少年共
嗤誚晚歲多因循賢哉漢二疎彼獨是何人寂寞東門
路無人繼此塵

立碑

勲德既下衰文章亦陵夷但見山中石立作路旁碑
銘勲悉太公叙德皆仲尼復以多為貴千言直萬貨
為文彼何人想見下筆時但欲愚者悅不思賢者嗤
我聞望江縣魏令撫惇嫠在官有仁政名不聞京師
身歿欲歸葬百姓遮路岐攀轅不得去留瘞此江渚
至今道其名男女涕皆垂無人立碑碣惟有邑人知

寓意詩

赫赫京內史炎炎中書郎昨傳徵拜日恩賜頗殊常貂
冠水蒼玉紫綬黃金章佩服身未煖已聞竄遐荒親戚
不得別吞聲泣路旁賓客亦已散門前羅雀張富貴來
不久倏如瓦溝霜權勢去尤速瞥若石火光不如守貧
賤貧賤可久長

其二

促織不成章提壺但聞聲嗟哉蟲與鳥無實有虛名與
君定交日久要如弟兄何以示誠信白水指為盟雲雨

一為別飛沈兩難并音信日已疎恩分日已輕窮通尚
如此何況死與生

其三

翩翩兩玄鳥本是同巢燕分飛來幾時秋夏炎涼變一
宿蓬草廬一栖明光殿偶因銜泥處復得重相見彼矜
杏梁貴此嗟茅棟賤眼看秋社至兩處俱難戀

其四

婆娑園中樹根株大合圍蠢爾樹間蟲形質一何微花

衰夏未實葉病秋先萎樹心半為土觀者安得知借問
蟲何在在身不在枝借問蟲何食食心不食皮豈無啄
木鳥嘴長將何為

讀史五首

楚懷放靈均國政亦荒淫彷徨未忍決遶澤行悲吟漢
文疑賈生謫置湘之陰是時刑方措此去難為心士生
一代間誰不有浮沉良時真可惜亂世何足欽乃知汨
羅恨未抵長沙深

禍患如紛絲其來無端緒馬遷下蠶室嵇康就囹圄抱
冤志氣屈忍恥形神沮當被戮辱時奮飛無翅羽商山
有黃綺潁川有巢許何不從之遊超然離網罟

漢日大將軍少為乞食子秦時故列侯老作鋤瓜士春
華何暉暉園中發桃李秋風忽蕭條堂上生荆杞深谷
變為岸桑田成海水勢去未須悲時來何足喜寄言榮
枯者反復殊未已

含沙射人影雖病人不知巧言構人罪至死人不疑拔

蜂殺愛子掩鼻殘寵姬弘恭陷蕭望趙高謀李斯陰德
既必報陰禍宜虛施人事雖可罔天道終難欺苟免勿
私喜鬼得而誅之

季子憔悴時婦見不下機買臣負薪日妻亦棄如遺一
朝黃金多佩印衣錦歸去妻不敢視婦嫂強依依富貴
家人重貧賤妻子欺奈何貧富間可移親愛志遂使中
人心汲汲求富貴

首夏同諸校正遊開元觀因宿翫月

我與二三子策名在京師官小無職事閒于為客時沈
沈道觀中心賞期在茲到門車馬迴入院中杖隨清和
四月初樹木正華滋風清寒葉影烏戀殘花枝向夕天
既清東南餘霞披置酒西廊下待月杯行遲須臾金魄
生若與吾徒期光華一照耀殿角相參差終夜清景前
笑歌不知疲長安名利藪此興幾人知

早送舉人入試

夙駕送舉人東方猶未明自謂出太早已有車馬行騎

火高低影街鼓參差聲可憐早朝者相看意氣生日出
塵埃飛羣動互營營營各何求無非利與名而我常
晏起虛往長安城春深官云滿日有歸山情

病假中南亭閒望

欹枕不視事兩日門掩闌始知吏役身不病那得閒閒
意不在遠小亭方大間西簷竹梢上坐見太白山遙愧
峰上雲對此塵中顏

仙遊寺獨宿

沙鶴上堦立潭月當戶開此中留我宿兩夜不能迴幸
與靜境遇喜無歸侶催從今獨遊後不擬共人來

松聲

月好好獨坐雙松在前軒西南微風來潛入枝葉間沈
寥發為聲半夜明月前寒山颯颯雨秋琴泠泠弦一聞
滌炎暑再聽破昏煩竟夕遂不寐心體俱翛然南陌車
馬動西隣歌吹繁誰知茲簷下蒲耳不為喧

禁中晚卧

遲遲禁漏盡悄悄冥鵲喧夜雨槐花落微涼卧北軒曙
燈殘未滅風簾閒自翻每得一靜境思與故人言

禁中偶直夢遊仙遊寺

西軒草詔暇松竹深寂寂月出清風來忽是山中夕因
成西南夢夢作遊仙客覺聞宮漏聲猶謂山泉滴

清夜琴興

月出烏栖盡寂然坐空林是時心境閒可以彈素琴清
冷由木性恬淡隨人心心積和平氣木應正始音響餘

羣動息曲罷秋夜深正聲感元化天地清沈沈

春眠

新浴肢體暢獨寢神魄安況因夜深坐遂成日高眠春
被薄亦煖朝窓深更閒却忘人間事似得枕上仙至適
無夢想太和難名言全勝彭澤醉欲敵曹溪禪何物呼
我覺伯勞聲闐闐起來妻子笑生計春茫然

東坡生意寄元八

寥落野陂畔獨行思有餘秋荷病葉上白露大如珠忽

意同賞地曲江西北隅秋池少遊客惟我與君俱啼蛩
隱紅蓼瘦馬躡青蕪當時與今日俱是暮秋初節物苦
相似時景亦無餘惟有人分散經年不得書

昭國閒居

貧閒日高起門巷晝寂寂時暑放朝叅天陰少人客槐
花滿田地僅絕人行跡獨在一牀眠清涼風雨夕勿嫌
坊曲遠近即多牽役勿嫌祿俸薄厚即多憂責平生尚
恬曠老大宜安適何以養吾真官閒居處僻

江州雪

新雪滿前山初晴好天氣日西騎馬出忽有京都意城
柳方綴花簷氷纔結穗須臾風日暖處處皆飄墜行吟
賞未足坐歎銷何易猶勝嶺南看紛紛不到地

題潯陽樓

嘗愛陶彭澤文思何高玄又怪韋江州詩情太幽閒今
朝登此樓有以知其然大江寒見底匡山青倚天清夜
湓浦月平坦鑪峰煙清輝與靈氣日夕供文篇我無二

人才孰為來其間因高偶成句俯仰愧江山

北亭

廬宮山下州湓浦沙邊宅宅北倚高岡迢迢數千尺上
有青青竹竹間多白石茅亭居上頭豁達門四闢前楹
捲簾箔北牖施牀席江風萬里來吹我涼淅淅日高公
府歸中笏隨手擲脫衣恣搔首坐卧任所適時傾一杯
酒曠望湖天夕口詠獨酌謠目送歸飛翮慙無出塵操
未免折腰役偶獲此閒居謬似高人跡

遊湓水

四月全未熟麥涼江風秋湖山處處好最愛湓水頭湓
水從東來一派入江流可憐似縈帶中有隨風舟命酒
此臨汎捨鞍揚棹謳煙浪始渺渺風襟亦悠悠初疑上
河漢中若尋瀛洲汀樹綠拂池沙草芳未休青蘿與紫
葛枝蔓垂相樛繫纜步平岬回頭望江州城雉映水見
隱隱如蜃樓日入意未盡將歸復少留到官行半歲今
日方一遊此地來何暮可以寫吾憂

宿簡寂觀

巖白雲尚屯林紅葉初隕秋光引閒步不知身遠近夕
投靈洞宿卧覺塵機泯名利心既忘市朝夢亦盡暫來
尚如此況乃終身隱何以療夜饑千秋雲母粉

春遊西林寺

下馬西林寺脩然進輕策朝為公府吏暮作靈山客二
月匡廬北冰雪始消釋陽叢抽茗芽陰竇洩泉脈熙熙
風土暖藹藹雲嵐積散作萬壑春凝為一氣碧身閒易

澹泊官散無牽迫
緬彼十八人
古今同此適
不才或相
容山中富泉石

出山吟

朝詠遊仙詩
暮歌采薇曲
卧雲坐白石
山中十五宿
行隨出洞水
回別綠巖竹
早晚重來遊
心期瑤草綠

歲暮

已任時命去
亦從歲月除
中心一調伏
外累盡空虛
名宦意已矣
林泉計何如
擬近東林寺
溪邊緝敝廬

遊石門澗

石門無舊逕披榛訪遺跡時逢山水秋清輝如古昔嘗
聞慧遠輩題詩在巖壁雲覆莓苔封蒼然無處覓蕭疎
野生竹崩剝多年石自從東晉後無復人遊歷獨有寒
澗聲潺湲空旦夕

題元十八溪亭

怪君不喜仕復遊煙霞里今日到幽居了然知所以宿
君石溪亭潺湲聲滿耳飲君螺杯酒醉卧不能起見君

五老峰益悔居城市愛君三男兒始歎身無子余方鑪
峰下結室為居士山北與山東往來從此始

香鑪峰下新置草堂即事詠懷題於石上

香鑪峰北面遺愛寺西偏白石何鑿鑿清流亦潺潺有
松數十株有竹千餘竿其下無人居悠哉多歲年有時
聚猿鳥終日空風煙時有沈冥子姓白字樂天平生無
所好見此心依然如獲終老地忽乎不知遷架巖結茅
宇斲壑開茶園何以洗我耳屋頭飛落泉何以洗我眼

砌下生白蓮左手携一壺右手挈五絃傲然意自足箕
踞於其間興酣仰天歌歌中聊寄言言我本野夫誤為
世網牽時來肯捧日老去今歸山倦鳥得茂樹涸魚反
清源捨此欲焉往人間多險艱

答香鑪峰

迢迢香鑪峰心存耳目想終年牽物役今日方一往攀
蘿躡危石手足勞俯仰同遊三四輩兩人不敢上及到
峰之頂目眩心恍恍高低有萬尋闊狹無數丈不窮視

聽界焉識宇宙廣江水細如繩湓城小于掌紛吾何屑
屑未能脫塵鞅歸去空自嗟低頭入蟻壤

截樹

種樹當前軒樹高柯葉繁惜哉遠山色隱此蒙籠間一
朝持斧斤手自截其端萬葉甫落上千峰來面前忽似
決雲霧豁達觀青天又如所念人久別一歎顏始有清
風至稍見飛鳥還開懷東南望目遠心怡然人各有偏
好物莫能兩全豈不愛柔條不如見青山

鄧州路中作

蕭蕭誰家村秋
槲葉半圻漠漠誰家園
秋韭花初白路逢故里物
使我嗟行役不歸渭北村
又作江南客去鄉徒自苦
濟世終無益自問波上萍
何如礪中石

初領郡政衙退登東樓作

鰥惻心所念簡牘手自操
何言符竹貴未免州縣勞
賴是餘杭郡臺榭遠官曹
凌晨親政事向晚恣遊遨
山冷微有雪波平未生濤
水心如鏡面千里無纖毫
直下江

最闊近東樓更高煩襟與滯念一望皆遁逃

除官

除官去未閒半月恣遊討朝尋霞外寺暮宿波上島新
樹少于松平湖半連草躋攀有次第賞翫無昏早有時
騎馬醉兀兀冥天造窮通與生死其奈吾懷抱江山信
為美齒髮行將老在郡誠未厭歸鄉去亦好

洛下卜居

三年典郡歸所得非金帛天竺石兩片華亭鶴一隻遠

從餘杭郭同到洛陽陌下檐拂雲根開籠展霜翮貞姿
不可雜高性宜其適遂就無塵坊仍求有水宅東南得
幽境樹老寒泉碧池畔多竹陰門前少人跡未請中庶
祿且脫雙驂易誠知足勞費其奈心愛惜

翰林院中感秋懷王質夫

何處感時節新蟬禁中間宮槐有秋意風夕花紛紛寄
跡鴛鴦行歸心鷗鶴羣惟有王居士知余憶白雲何日
仙遊寺潭前秋見君

禁中月

海上明月出禁中
清夜長東南樓殿
白稍稍上官牆淨
落金塘水明浮玉
砌霜不比人間見
塵土污清光

初見白髮

白髮生一莖朝來
明鏡裏勿言一莖
少滿頭從此始青
山方遠別黃綬初
從仕未料容鬢間
蹉跎忽如此

別元九後詠所懷

零落桐葉雨蕭條
槿花風悠悠早秋
意生此幽閒中况

與故人別中懷正無悰勿云不相送心到青門東相知
豈在多但問同不同同心一人去坐覺長安空

別舍弟後月夜

悄悄初別後去住兩盤桓行子孤燈店居人明月軒平
生共貧苦未必日成歡及此暫為別懷抱已憂煩况是
庭葉盡復思山路寒如何為不念馬瘦衣裳單

新豐路逢故人

塵土長路晚風煙廢宮秋相逢立馬語盡日此橋頭知

君不得意鬱鬱來西遊惆悵新豐店何人識馬周

青龍寺早夏

塵埃經小雨地迴倚長坡日西寺門外風景含清和閒
有老僧立靜無凡客過殘鶯意思盡新葉陰涼多春去
來幾日夏雲忽嵯峨朝朝感時節年鬢空蹉跎胡為戀
朝市不去歸煙蘿

秋題牡丹叢

晚叢白露夕衰葉涼風朝紅艷久已歇碧芳今亦銷幽

人坐相對心事共蕭條

和元九悼往

美人別君去自去無處尋舊物零落盡此情安可任
惟有纈紗幌塵埃日夜侵馨香與顏色不似舊時深
透影燈耿耿籠光月沉沉中有孤眠客秋涼生夜衾
舊宅牡丹院新墳松木林夢中咸陽淚覺後江陵心
含此隔年愛還為中夜吟無論君自感聞者欲沾巾

重到渭江舊居

舊居清渭曲開門當蔡渡十年方一還幾欲迷歸路追
思昔日行感傷故遊處插柳作高林種桃成老樹因驚
成人者盡是舊童孺試問舊老人半為遶村墓浮生同
過客前後遞來去白日如弄珠出入先不住人物日改
變舉目悲所遇回念念我身安得不衰暮朱顏銷不歇
白髮生無數惟有柴門外三峰色如故

遊襄陽懷孟浩然

楚山碧巖巖漢水碧湯湯秀氣結成象孟氏之文章今

我諷遺文思人至其鄉清風無人繼日暮空襄陽南望
鹿門山藹若有餘芳舊隱不知處雲深樹蒼蒼

留別

秋涼卷朝簾春暖撤夜衾雖是無情物欲別尚沈吟
況與有情別別隨情淺深二年歡笑意一旦東西心獨留
誠可念同行力不任前事詎能料後期諒難尋惟有潺
湲淚不惜共沾襟

曉別

曉鼓聲已半離筵坐難久請君斷腸歌送我和淚酒月
落欲明前馬嘶初別後浩浩闔塵中何由見回首

新秋

西風飄一葉庭前颿已涼風池明月水衰蓮白露房其
奈江南夜縣縣自此長

秋江送客

秋鴻次第過哀猿朝夕聞是日孤舟客此地亦離羣濛
濛潤衣雨漠漠冒帆雲不醉潯陽酒煙波愁殺人

秋霽

金木不相待炎涼雨中變
林霽有殘蟬巢冷無留燕
沈吟卷長簾愴惻收團扇
向夕殊寡泥閒步青苔院
月出砧杵動家家擣秋練
獨對多病妻不能理針線
冬衣殊未製夏服行將綻
何以迎早秋一杯聊自勸

溪中早春

南山雪未盡陰嶺尚留白
西澗冰已銷春溜含新碧
東風來幾日蟄動萌草坼
潛知陽和功一日不虛擲
愛此

天氣暖來拂溪邊石閒坐欲忘歸暮禽聲嘖嘖蓬蒿間
桑棗隱映煙火夕歸來問夜餐家人烹薺麥

登村東古塚

高低古時塚上有牛羊道獨立最高頭悠哉此懷抱回
頭向村望但見荒田草村人不愛花多種粟與棗自來
此村住不覺風光好花少鶯亦稀年年春閨老

別行簡

漠漠病眼花星星愁鬢雪筋骸已衰憊形影仍分訣梓

州二千里劒門五六月豈是遠行時火雲燒棧熱何言
巾上淚乃是腸中血念此早歸來莫作經年別

感鏡

美人與我別留鏡在匣中自從花顏去秋水無芙蓉經
年不開匣紅塵覆青銅今朝一拂拭自顧憔悴容照罷
重惆悵背後雙盤龍

喜友至留宿

村中少賓客柴門多不開忽聞車馬至云是故人來況

值風雨夕愁心正悠哉願君且同宿盡此手中杯人生
開口笑百年都幾回

渭村雨歸

渭水寒漸落離離蒲稗苗閒傍沙邊立看人刈葦苔近
水風景冷晴明猶寂寥復茲夕陰起野思重蕭條蕭條
獨歸路暮雨濕村橋

村居卧病

戚戚抱羸病悠悠度朝暮夏木纔結陰秋蘭已含露前

日巢中卵化為雛飛去昨日穴中蟲蛻為蟬上樹四時
未嘗歇一物不暫住惟有病客心沈然獨如故

病中友人相訪

卧久不紀日南窓昏復昏蕭條草簷下寒雀朝夕聞強
扶牀前杖起向庭中行偶逢故人至便當一逢迎移榻
就斜日披裘倚前楹閒談勝服藥稍覺有心情

孟夏思渭村舊居寄舍弟

嘖嘖雀引雛梢梢笋成竹時物感人情思我故鄉曲故

園渭水上十載事樵牧手種榆柳成陰陰覆墻屋兔隱
豆苗肥鳩鳴桑椹熟前年當時與爾同遊矚詩書課
弟姪農圃資童僕日暮麥登場天晴蠶坼簇弄泉南澗
坐待月東亭宿一朝忽分散萬里仍羈束井鮒思反泉
籠鶯悔出谷九江地卑濕四月天炎燠苦雨初入梅瘴
雲稍含毒泥秧水畦稻灰種畬田粟已訝殊歲時仍嗟
異風俗閒登郡樓望日落江山綠歸鴈拂鄉心平湖斷
人目如我方漂泊彌羨君幽獨

早蟬

六月初七日江頭蟬始鳴石楠深葉裏薄暮雨三聲一
催衰鬢色再改故園情西風殊未起秋思先秋生憶昔
在東掖宮槐花下聽今朝無限思雲樹遠湓城

南湖晚秋

八月白露降湖中水方老旦夕秋風多衰荷半傾倒手
攀青楓樹足蹋黃蘆草慘澹老容顏零落秋懷抱有兄
在淮楚有弟在蜀道萬里何時來煙波白浩浩

感秋懷微之

葉下湖有波秋風此時至誰知淩落心先納蕭條氣推
移感時歲漂泊思同志昔為煙霞侶今作泥塗吏白鷗
毛羽弱青鳳文章異各閉一籠中歲晚同憔悴

早秋晚望兼呈韋侍郎

九派遶孤城城高生遠思人煙半在船野水多于地穿
霞日脚直驅鴈風頭利去國來幾時江上秋三至夫君
亦淪落此地同漂寄憫然向隅心推顏觸籠翅且謀眼

前適莫問胸中事潯陽酒甚濃相勸時時醉

司馬宅

雨徑綠蕪合霜園紅葉多蕭條司馬宅門巷無人過惟
對大江水秋風朝夕波

初到忠州登東樓寄萬州楊八使君

山東邑居穿峽牽氣候偏林巒少平地露雨多陰天隱
隱煮鹽火漠漠燒畬煙賴此東樓夕風月得脩然憑軒
望所思目斷心涓涓背春有去鴈上水無來船我懷已

東守乃是關西賢平生已不淺流落重相憐水梗漂萬里籠禽囚五年新恩同雨露遠郡隣山川書信雖往復封疆徒接連其如美人面欲見杳無緣

西樓夜

悄悄復悄悄城隅隱林杪山郭燈火稀峽天星漢少年光東流水生計南枝鳥月沒光沈沈西樓殊未曉

招蕭處士

峽內豈無人所逢非所思門前亦有客相對不相知仰

望但雲樹俯對惟妻兒寢食起居外端然無所為東郊
蕭處士聊可與開眉能飲盈杯酒善吟長句詩庭前吏
散後江畔路乾時請君携竹杖一赴郡齋期

送客回晚興

城上雲霧開沙頭風浪定參差亂山出淡泞平江淨行
客舟已遠居人酒初醒嫋嫋秋竹梢已蟬聲似磬

江上送客

江花已萎絕江草已銷歇遠客何處歸孤舟今日發杜

鵲聲似哭湘竹斑如血共是多感人仍為此中別

重過壽泉憶與楊九別時因題店壁

商州南十里有水名壽泉湧出石崖下流經山店前憶
昔相送日我去君言還寒波與老淚此地共潺湲一去
歷萬里再來經六年形容已變改處所猶依然他日君
過此殷勤吟斯篇

秋思

病眠夜少夢閒立秋多思寂寞餘雨晴蕭條早寒至鳥

栖紅葉樹月照青苔地何況鏡中年又過三十二

郡中西園

閒園多芳草春夏香靡靡深樹足佳禽旦暮鳴不已
院門閉松竹庭逕穿蘭茝愛彼池上橋獨來聊徙倚
魚依藻長樂鷗見人暫起有時舟隨風盡日蓮照水
誰知郡府內景物閒如此始悟誼靜緣何嘗繫遠邇

崔湖州贈紅石琴薦煥如錦文無以答之以詩

酬謝

顏錦支綠綺韻同相感深千年古澗石八月秋堂琴引出山水思助我金玉音人間無可比惟我與君心

寄庾侍郎

一雙華亭鶴數片太湖石巉巉蒼玉峰矯矯青雲翮是時歲云暮淡泊煙景夕庭霜封石稜池雪印鶴迹幽致竟誰知閒靜聊自適懷哉庾順之好是今宵客

代鶴

我本海上鶴偶逢江南客感君一顧恩同來洛陽陌洛

陽寡族類皎皎惟兩翼貌是天與高色非日浴白主人
誠可戀其奈軒庭窄飲啄雜雞羣年深損標格故鄉渺
何處雲水重重隔誰念深籠中屢換摩天翮

山鷓鴣

山鷓鴣朝朝暮暮啼復啼時露白風淒淒寒茅江頭
秋日晚苦竹嶺下寒月低畝田有粟何不啄石楠有枝
何不棲迢迢不緩復不急樓上舟中聲聞入夢鄉遷客
展轉卧抱兒寡婦傍彷徨立山鷓鴣爾本此鄉鳥生不辭

巢不別羣何苦聲聲啼到曉

真娘墓

真娘墓虎丘道不識真娘鏡中面惟見真娘墓前草霜
摧桃李風折蓮真娘死時猶少年脂膚美手不牢固世
間尤物難留連難留連易消歇塞北花江南雪

長恨歌

漢王重色思傾國御宇多年求不得楊家有女初長成養
在深閨人未識天生麗質難自棄一朝選在君王側回頭

一笑百媚生六宮粉黛無顏色春寒賜浴華清池溫泉水
滑洗凝脂侍兒扶起嬌無力始是新承恩澤時雲鬢花顏
金步搖芙蓉帳暖度春宵春宵苦短日高起從此君王不
早朝承歡侍宴無閒暇春從春遊夜專夜後宮佳麗三千
人三千寵愛在一身金屋妝成嬌侍夜玉樓宴罷醉和春
姊妹弟兄皆列土可憐光彩生門戶遂令天下父母心不重
生男重生女驪宮高處入青雲仙樂風飄處處聞緩歌
謾舞凝絲竹盡日君王看不足漁陽鼙鼓動地來驚破霓

裳羽衣曲九重城闕煙塵生千乘萬騎西南行翠華搖搖
行復止西出都門百餘里六軍不發無奈何宛轉蛾眉馬前
死花鈿委地無人收翠翹金雀玉搔頭君王掩面救不得回
首血淚相和流黃埃散漫風蕭索雲棧縈紆登劔閣峨眉山
下少人行旌旗無光日色薄蜀江水碧蜀山青聖主朝朝暮
暮情行宮見月傷心色夜雨聞鈴腸斷聲天旋地轉迴龍馭
到此躊躇不能去馬嵬坡下泥土中不見玉顏空死處君臣相
顧盡沾衣東望都門信馬歸歸來池苑皆依舊太液芙蓉

蓉未央柳芙蓉如面柳如眉對此如何不淚垂春風桃李
花開日秋雨梧桐葉落時西宮南苑多秋草落葉滿階紅
不掃梨園弟子白髮新椒房阿監青娥老夕殿螢飛思悄然
孤燈挑盡未成眠遲遲鐘鼓初長夜耿耿星河欲曙天鴛鴦
鴛瓦冷霜華重翡翠衾寒誰與共悠悠生死別經年魂魄不
曾來入夢臨邛道士鴻都客能以精神致魂魄為感君王展
轉思遂教方士殷勤覓排空馭氣奔如電升天入地求之徧
上窮碧落下黃泉兩處茫茫皆不見忽聞海上有仙山山在

虛無縹緲間樓閣玲瓏五雲起其中綽約多仙子中有一人
字太真雪膚花貌參差是金闕西廂叩玉扃轉教小玉報雙
成聞道漢家天子使九華帳裏夢魂驚攬衣推枕起徘徊珠
箔銀屏選迤開雲髻半偏新睡覺花冠不整下堂來風吹
仙袂飄飄舉猶似霓裳羽衣舞玉容寂寞淚闌干梨花一
枝春帶雨含情凝涕謝君王一別音容兩渺茫昭陽殿裏
恩愛絕蓬萊宮中日月長回頭下望人寰處不見長安見
雲霧惟將舊物表深情鈿合金釵寄將去釵留一股合一

扇釵劈黃金合分鈿但願心似金鈿堅天上人間會相
見臨別殷勤重寄詞詞中有誓兩心知七月七日長生
殿夜半無人私語時在天願作比翼鳥在地願為連理
枝天長地久有時盡此恨絲絲無絕期

長安道

花枝缺處青樓開艷歌一曲酒盈杯美人勸我急行樂
自古朱顏不再來君不見外州官客長安道一迴來時
一迴老

寒食野望吟

丘墟郭門外寒食誰家哭
風吹曠野紙錢飛古墓累累
春草綠棠梨花映白楊樹
盡是生魂離別處冥濛重泉
哭不聞瀟瀟暮雨人歸去

琵琶引

并序

元和十年余左遷九江郡司馬
明年秋送客湓浦口聞舟中夜彈琵琶者
聽其音錚錚然有京都聲
問其人本長安娼女嘗學琵琶於穆曹二善才年

長色衰委身為賈人婦遂命酒使快彈數曲曲罷
憫然自叙少小時歡樂事今漂淪憔悴轉徙於江
湖間余出官二年怡然自安感斯人言是夕始覺
有遷謫意因為長句歌以贈之凡六百一十六言
命曰琵琶行

潯陽江頭夜送客楓葉荻花秋瑟瑟主人下馬客在船
舉酒欲飲無管絃醉不成歡慘將別別時茫茫江浸月
忽聞水上琵琶聲主人忘歸客不發尋聲聞問彈者誰

琵琶聲停欲語遲移船相近邀相見添酒回燈重開宴
千呼萬喚始出來猶抱琵琶半遮面轉軸撥絃三兩聲
未成曲調先有情絃掩抑聲聲思似訴平生不得志
低眉信手續續彈說盡心中無限事輕攏慢撚抹復挑
初為霓裳後六么大絃嘈嘈如急雨小絃切切如私語
嘈嘈切切錯雜彈大珠小珠落玉盤間關鶯語花底滑
幽咽泉流水下灘水泉冷澁絃凝絕凝絕不通音暫歇
別有幽愁闇恨生此時無聲勝有聲銀餅乍破水漿迸

鐵騎突出刀鎗鳴曲終收撥當心畫四絃一聲如裂帛
東船西舫悄無言惟見江心秋月白沈吟放撥插絃中
整頓衣裳起斂容自言本是京城女家在蝦蟆陵下住
十三學得琵琶成名屬教坊第一部曲罷長教善才服
裝成每被秋娘妬五陵年少爭纏頭一曲紅綃不知數
鈿頭銀篦擊節碎血色羅裙翻酒污今年歡笑復明年
秋月春風等閒度弟走從軍阿姨死暮去朝來顏色故
門前冷落鞍馬稀老大嫁作商人婦商人重利輕別離

前月浮梁買茶去去來江口守空船
遶船明月江水寒
夜深忽夢少年事夢啼妝淚紅闌干
我聞琵琶已歎息
又聞此語重唧唧同是天涯淪落人
相逢何必曾相識
我從去年辭帝京
謫居卧病潯陽城
潯陽地僻無音樂
終歲不聞絲竹聲
住近湓江地低濕
黃蘆苦竹遶宅生
其間旦暮聞何物
杜鵑啼血猿哀鳴
春江花朝秋月夜
往往取酒還獨傾
豈無山歌與村笛
嘔啞嘲哢難為聽
今夜聞君琵琶語
如聽仙樂耳暫明
莫辭更坐彈一曲

為君翻作琵琶行感我此言良久立却坐促絃轉急
淒淒不似向前聲滿座重聞皆掩泣座中泣下誰最多
江州司馬青衫濕

醉歌示妓人商玲瓏

罷胡琴掩秦瑟玲瓏再拜歌初畢誰道使君不解歌聽
唱黃雞與白日黃雞催曉丑時鳴白日催年酉時沒腰
間紅綬繫未穩鏡裏朱顏看已失玲瓏玲瓏奈老何使
君歌罷汝更歌

霓裳羽衣歌和微之

我昔元和侍憲皇，曾陪內宴宴昭陽。
千歌百舞不可數，就中最愛霓裳舞。
舞時寒食春風天，玉鉤闌下香案前。
案前舞者顏如玉，不著人家俗衣服。
虹裳霞帔步搖冠，鈿璫累累珮珊珊。
娉婷似不任羅綺，顧聽樂懸行復止。
磬蕭笛箏遞相攙，擊擗彈吹聲瀟灑。
迤散序六奏未動衣，陽臺宿雲慵不飛。
中序擘騷初入拍，秋竹竿裂春冰拆。
飄然轉旋迴雪輕，嫣然縱送游龍驚。
小垂手後柳無力，

斜曳裾時雲欲生，煙蛾斂略不勝態。風袖低昂如有情，
上元點鬟招萼綠。王母揮袂別飛瓊，繁音急節十二偏。
跳珠撼玉何鏗錚，翔鸞舞了却收翅。淚鶴曲終長引聲，
當時乍見驚心目。凝視諦聽殊未足，一落人間八九年。
耳冷不曾聞此曲，湓城但聽山魈語。巴峽惟聞杜鵑哭，
移領錢塘二十年。始有心情問絲竹，玲瓏瑩篴謝好箏。
陳寵感栗沈平笙，清絃脆管纖纖手。教得霓裳一曲成，
虛白亭前湖水畔。前後祇應三度按，便除庶子拋却來。

聞道如今各星散今年五月至蘇州朝鐘暮角催白頭
貪看紫牘常侵夜不聽笙歌直到秋秋來無事多閒悶
忽憶霓裳無處問聞君部內多樂徒問有霓裳舞者無
答云十縣千萬戶無人知有霓裳舞惟寄長歌與我來
題作霓裳羽衣譜四幅花牋碧間紅霓裳實錄在其中
千姿萬狀分明見恰與昭陽舞者同眼前髣髴觀形質
昔日今朝想如一疑從魂夢呼召來似著丹青圖寫出
我愛霓裳君合知發于歌詠形于詩由來能事皆有主

楊氏創聲君造譜君言此舞難得人須是傾城可憐女
吳妖小玉飛作煙越艷西施化為土嬌花巧笑久寂寥
館娃苧蘿空處所如君所言誠有是君試從容聽我語
若求國色始翻傳但恐人間廢此舞妍媸優劣寧相遠
大都只在人擡舉李娟張態君莫嫌亦擬隨宜且教取
題靈巖寺

娃宮屨廊尋已傾硯池香徑又欲平二三月時但草綠
幾百年來空月明使君雖老頗多思携觴領妓處處行

今愁古恨入絲竹一曲涼州無限情
直是當時到今日
中間歌吹更無聲

縣西郊秋寄贈馬造

紫閣峰西清渭東郊煙深處夕陽中
風荷老葉蕭條綠
水蓼殘花寂寞紅
我厭宦遊君失意可憐秋思兩心同
聞夜砧

誰家思婦秋擣帛月苦風淒砧杵悲
八月九月正長夜
千聲萬聲無了時
應到天明頭盡白
一聲添得一莖絲

板橋路

梁苑城西二十里一渠春水柳千條
若為此路今重過
十五年前舊板橋曾共玉顏橋上別
不知消息到今朝

憶江南詞三首

江南好風景舊曾諳
日出江花紅似火
春來江水綠如藍
能不憶江南

江南憶最憶是杭州
山寺月中尋桂子
郡亭枕上看湖頭
何日更重遊

江南憶其次憶吳宮吳酒一杯春竹葉吳娃雙舞醉芙蓉
早晚復相逢

送文暢上人東遊

得道即無著隨緣西復東貌依年臘老心到夜禪空
山宿馴溪虎江行攄水蟲悠悠塵客思春滿碧雲中

送武士曹歸蜀

花落鳥嚶嚶南歸稱野情月宜秦嶺宿春好蜀江行
鄉路通雲棧郊扉近錦城烏臺涉岡送人羨別時榮

賦得古原草送別

離離原上草一歲一枯榮
野火燒不盡春風吹又生
遠芳侵古道晴翠接荒城
又送王孫去萋萋滿別情

旅次景空寺宿幽上人院

不與人境接寺門開向山
暮鐘鳴鳥息秋雨病僧閒
月隱松樹外螢飛廊宇間
幸投花界宿聊得靜心顏

秋暮郊居書懷

郊居人事少書卧對林巒
窮巷厭多雨貧家愁早寒
葛

衣秋未換書卷病仍看若問生涯計前溪一釣竿

遊寶稱寺

竹寺初晴日花塘欲晚春
野猿皆戲客山鳥似呼人
酒嫩傾金液茶新碾玉塵
可憐幽靜地堪寄老慵身

百花亭

朱檻在空虛涼風八月初
山形如峴首江色似桐廬
佛寺乘船入人家枕水居高亭
仍有月今夜宿何如

晚題東林寺雙池

向晚雙池好初晴百物新
裊枝翻翠羽潑水躍紅鱗
萍汎同遊子蓮開當麗人
臨流一惆悵還憶曲江春

夜送孟司功

潯陽白司馬夜送孟功曹
江關管絃急樓明燈火高
湖波翻似箭霜草殺如刀
且莫開征棹陰風正怒號

山中酬江州崔使君見寄

眷盼情無恨優容禮有餘
三年為部吏一半屬山居
酒熱心相憶詩來手自書
庾樓春好醉明月且迴車

潯陽宴別

鞍馬軍城外，笙歌祖帳間。
乘潮發湓口，帶雪別廬山。
暮景牽行色，春寒散醉顏。
共嗟炎瘴地，盡室得生還。

夜入瞿塘峽

瞿塘天下險，夜上信難哉。
岼似雙屏合，天如匹帛開。
逆風驚浪起，拔柁闇船來。
欲識愁多少，高于滌瀨堆。

酬嚴中丞晚眺黔江見寄

江水三迴曲，愁人兩地情。
磨圍山下色，明月峽中聲。
晚

後連天碧秋來徹底清
臨流有新恨照見白鬚生

孤山寺遇雨

拂波雲色重灑葉雨聲繁
水鷺雙飛起風荷一向翻
空濛連北岼蕭颯入東軒
或擬湖中宿停船在寺門

除日答夢得同發楚州

共作千里伴俱為一郡迴
歲陰中路盡鄉思先春來
山雪晚猶在淮水晴欲開
歸歟吟可作休戀主人杯

除蘇州刺史別洛城東花

亂雪千花落新絲兩鬢生老除吳郡守春別洛陽城江
上今重去城東更一行別花何用伴勸酒有殘鶯

船夜援琴

鳥栖魚不動月照夜江深身外都無事舟中只有琴七
絃為益友兩耳是知音心靜即聲淡其間無古今

閒詠

步月憐清景眠松愛綠陰早年詩思苦晚歲道情深夜
學禪多坐秋牽興暫吟悠然兩事外無處更留心

對琴待月

竹院新晴夜松窓未卧時
共琴為老伴與月訂秋期
玉軫臨風久金波出霧遲
幽音待清景惟是我心知

無夢

老眼花前暗春衣雨後寒
舊詩多忘却新酒且嘗看
拙定于身穩慵應趣伴難
漸銷名利想無夢到長安

長安早春旅懷

軒車歌吹諠都邑中有一人向隅立
夜深明月卷簾愁

日暮青山望鄉泣風吹新綠草茅坼雨灑輕黃柳條濕
此生知負少年春不展愁眉欲三十

八月十五日夜禁中獨直對月憶元九

銀臺金闕夕沈沈獨宿相思在翰林三五夜中新月色
二千里外故人心渚宮東面煙波冷浴殿西頭鐘漏深
猶恐清光不同見江陵卑濕易秋陰

晚秋夜

若碧溶溶月華靜月裏愁人弔孤影花間殘菊傍疎籬

葉下衰桐落寒井塞鴻飛急覺秋盡隣雞鳴遲知夜永
凝情不語空所思風吹白露衣裳冷

宿西林寺早赴東林滿上人之會因寄崔二十

二員外

謫辭魏闕鵬鸞隔老入廬山麋鹿隨薄暮蕭條投寺宿
凌晨清淨與僧期雙林我起聞鐘後隻日君趨入閣時
鵬鸞高低分皆定休勞心力遠相思

香爐峰下新卜山居草堂初成偶題東壁

長松樹下小溪頭斑鹿胎巾白布裘藥圃茶園為產業
野麋林鶴是交游雲生澗戶衣裳潤嵐隱山厨火燭幽
最愛一泉新引得清泠屈曲遶階流

又

日高睡足猶慵起小閣重裘不怕寒遺愛寺前歌枕聽
香爐峰雪撥簾看匡廬便是逃名地司馬仍為送老官
心泰身寧是歸處故鄉何獨在長安

正月十五日夜東林寺學禪偶懷藍田楊主簿

因呈智禪師

新年三五東林夕星漢迢遙鐘梵遲花縣當春行樂處
松房此夜坐禪時忽看月滿還相憶始歎春來自不知
微覺定中初念起明朝更問雁門師

尋郭道士不遇

郡中乞假來相訪洞裏朝元去不逢看院祇留雙白鶴
入門惟見一青松藥爐有火丹應伏雲碓無人水自舂
欲問參同契中事更期何日得從容

李白墓

采石江邊李白墳，遶田無限草連雲。
可憐荒壟窮泉骨，曾有驚天動地文。
但是詩人多薄命，就中淪落不過君。
渚蘋溪藻猶堪薦，大雅遺風已不聞。

杭州春望

望海樓明照曙霞，護江隄白蹋晴沙。
濤聲夜入伍員廟，柳色春藏蘇小家。
紅袖織綾誇柿蒂，青旗沽酒趁梨花。
誰開湖寺西南路，草綠裊腰一道斜。

餘杭形勝

餘杭形勝四方無州傍青山縣枕湖遶郭荷花三十里
拂城松樹一千株夢兒亭古傳名謝教妓樓新道姓蘇
獨有使君年太老風光不稱白髭鬚

宿裴相公興化池亭

林亭一出宿風塵忘却平津是要津松閣晴看山色遠
石渠秋放水聲新孫弘閣開無閒客傳說舟忙不借人
何似掄才濟川外別開池館侍交親

鏡換杯

欲將珠匣青銅鏡換取金樽白玉卮
鏡裏老來無避處樽前愁至有消時
茶能散悶為功淺萱縱忘憂得力遲
不似杜康神用速纔傾一盞便開眉

酬李二十侍郎

筍老蘭長花漸稀衰翁相對惜芳菲
殘鶯著雨慵教轉落絮無風凝不飛
行撥木芽供野食坐牽蘿蔓挂朝衣
十年分手今同醉醉未如泥莫道歸

寄題廬山舊草堂兼呈二林寺道侶

三十年前草堂主而今雖在鬢如絲登山臨水應無力
不似江州司馬時漸伏酒魔休放醉猶殘口業未拋詩
君行若過爐峰下為報東林長老知

江樓早秋

南國雖多熱秋來亦不遲湖光朝霽後竹氣晚涼時樓
閣宜佳客江山入好詩清風水蘋葉白露木蘭枝欲作
雲泉計須營伏臘資匡廬一步地官滿更何之

送客春遊嶺南二十韻

已訝遊何遠仍嗟別太頻離容君感促贈語我殷勤迢
遞天南面蒼茫海北濬訶陵國分界交趾郡為隣翁鬱
三光晦溫暾四氣勻陰晴變寒暑昏曉錯星辰瘴地難
為老蠻貊不易馴土民稀白首洞主盡黃巾戰艦猶驚
浪戎車未息塵紅旂遮卉服紫綬裹文身麪苦桺榔製
漿酸橄欖新牙檣迎海舶銅鼓賽江神不凍貪泉暖無
霜毒草春雲煙蟒蛇氣刀劒鰐魚鱗路足羈棲客官多

謫逐臣天黃生颺母雨黑長楓人迴使先傳語征軒早
返輪須防杯裏蠱莫愛橐中珍北與南殊俗身將貨孰
親嘗聞君子誠憂道不憂貧

題遺愛寺前溪松

偃亞長松樹侵臨小石溪靜將流水對高共遠峰齊翠
蓋煙籠密花幢雪壓低與僧清影坐借鶴穩枝栖筆寫
形難似琴偷韻易迷暑天風撼撼晴夜露淒淒獨憩依
為舍閒行遠作溪棟梁君莫採留伴宿猿啼

題郇中荔枝詩十八韻兼寄楊萬州八使君

奇果標南土芳林對北堂素華春漠漠丹實夏煌煌葉
捧低垂戶枝擎重壓牆始因風弄色漸與日爭光夕訝
條懸火朝驚樹點妝深于紅躑躅大校白檳榔星綴連
心朶珠排耀眼房紫蘿裁襯殼白玉裏填瓢早歲曾聞
說今朝始摘嘗嚼疑天上味嗅異世間香潤勝蓮生水
鮮逾橘被霜臙脂掌中顆甘露舌頭漿物少猶珍重天
高苦渺茫已教生暑月又使阻遐方粹液靈難駐妍姿

嫩易傷近南光景熱向北道途長不得充王賦無由寄
帝鄉惟君堪擲贈面白似潘郎

發白狗峽次黃牛峽登高寺却望忠州

白狗次黃牛灘如竹節稠路穿天地險人續古今愁忍
見千花塔因停一葉舟畏途常迫促靜境暫淹留巴曲
春全盡巫陽雨半收北歸雖引領南望亦迴頭昔去悲
殊俗今來念舊遊別僧山際寺拋竹水西樓郡署花如
雪軍厨酒似油時時一開口自笑在忠州

送客南遷

我說南中事君應不願聽曾經身困苦不覺語丁寧燒
處愁雲夢波時憶洞庭春畚煙勃勃秋瘴露冥冥蚊蚋
經冬活魚龍欲雨腥水蟲能射影山鬼解藏形穴掉已
蛇尾林飄鵠鳥鵠颺風千里黑蕪草四時青客似驚弦
鴈舟如委浪萍誰人勸言笑何計慰漂零慎勿琴離膝
長須酒滿瓶大都從此去宜醉不宜醒

重到江州感舊遊題郡樓十一韻

掌綸知是忝剖竹信為榮才薄官仍重恩深責尚輕昔
徵從典午今出自承明鳳詔休揮翰漁歌待濯纓還乘
小樓艤却到古湓城醉客臨江待禪僧出郭迎青山滿
眼在白髮半頭生又較三年老何曾一事成重過蕭寺
宿再上庾樓行雲水新秋思閭閻舊日情郡民猶認得
司馬詠詩聲

題別遺愛草堂兼呈李十使君

曾住爐峰下書堂對藥臺新新蘿逕合依舊竹窓開砌

水親開決池荷手自栽五年方暫至一宿又須回縱未
長歸得猶勝不到來君家白鹿洞聞道亦生苔

題東武丘寺六韻

香刹看非遠祇園入始深龍蟠松矯矯玉立竹森森怪
石千僧坐靈池一劒沉海當亭兩面山在寺中心酒熟
憑花勸詩成倩鳥吟寄言軒冕客此地好抽簪

夜遊西武丘寺八韻

不厭西丘寺閒來即一過舟船轉雲島樓閣出煙蘿路

入青松影門臨白月波魚跳驚東燭猿覷怪鳴珂搖曳
雙紅旆娉婷十翠娥香花助羅綺鐘梵避笙歌領郡時
將久遊山數幾何一年十二度猶覺未能多

憶洛中所居

忽憶東都宅春來事宛然雪銷行徑裏水上卧房前厭
綠栽黃竹嫌紅種白蓮醉教鶯送酒閒遣鶴看船幸是
林園主慙為食祿牽宦情薄似紙鄉思急如弦豈合姑
蘇守歸休更待年

題洛中第宅

水木誰家宅門高占地寬
懸魚挂青甃行馬護朱欄
春榭籠煙暖秋庭鏤月寒
松膠粘琥珀筠粉撲琅玕
試問池臺主多為將相官
終身不曾到惟展宅圖看

和微之春日投簡陽明洞天排律

青陽行已半白日坐將徂
越國強仍大稽城高且孤
利饒鹽煮海名勝水澄湖
牛斗天垂象台明地展圖
環竒填市井佳麗溢闔閭
句踐遺風霸西施舊俗姝
船頭龍

天矯橋脚獸眈眈鄉味珍蜉蝣時鮮貴鷓鴣語多諸夏
異衣服一方殊搗練蛾眉婢鳴榔蛙角奴江清敵伊洛
山翠勝荆巫華表雙栖鶴聯檣幾點烏煙波分渡口雲
樹接城隅澗遠松如畫洲平水似鋪綠科秧早稻紫笋
折新蘆暖蹋泥中藕香尋石上蒲雨來萌盡達雷後蟄
全蘇柳眼黃絲纈花房絳蠟珠林風新竹折野燒老桑
枯帶彈長枝蕙錢穿短貫榆暄和生野菜早濕長街蕪
女浣紗相伴兒烹鯉一呼山魃啼穉子林猿挂山都產

業論蠶蟻孳生計鴨雛泉巖雪飄灑苔壁錦漫糊堰限
舟航路堤通車馬途耶溪岍回合禹廟徑盤紆洞穴何
因鑿星槎誰與列石凹仙藥曰峰峭佛香爐去為投金
簡來因挈玉壺貴仍招客宿健未要人扶聞望賢丞相
儀形美大夫前驅駐旌旆徧坐列笙箏刺史旗翻隼尚
書履曳鳬學禪起後有觀妙造虛無髻裏傳僧寶環中
得道樞登樓詩八詠置研賦三都捧擁羅將綺趨踏紫
輿朱送觥歌宛轉嘲妓笑胡盧佐飲時炮鼈蠲醒數膽

鱸醉鄉雖咫尺樂事亦須臾若不中賢聖何由外智愚
伊余一生志負爾百年軀

洛橋寒食日作十韻

上苑風煙好中橋道路平蹴毬塵不起潑火雨新晴宿
醉頭仍重晨遊眼乍明老慵雖省事春誘尚多情遇客
踟躕立尋花取次行連錢嚼金勒鑿落寫銀罌府醞傷
教送官娃喜要迎舞腰那及柳歌舌不如鶯鄉國真堪
戀光陰可合輕三年過寒食盡在洛陽城

想東遊五十韻

并序

太和三年春余病免官後憶遊浙右數郡兼思到
越一訪微之故兩浙之間一物已上想皆寓目吟
且成篇不能自休盈五百字亦猶孫興公想天台
山而賦之也

海內時無事江南歲有秋生民皆樂業地主盡賢侯郊
靜銷戎馬城高逼斗牛平河七百里沃壤二三州坐有
湖山趣行無風浪憂食寧妨解纜寢不廢乘流泉石諳

天竺煙霞識虎丘餘芳認蘭澤遺詠思蘋洲菡萏紅塗
粉菰蒲綠潑油參差漁戶舍綺錯稻田溝紫洞藏仙窟
玄泉貯怪湫精神昂老鶴姿彩媚潛蚪靜閱天工妙閒
窺物狀幽投竿出比目擲果下獼猴味苦蓮心小漿甜
蔗節稠橘苞從自結藕孔是誰鏤逐日移潮信隨風變
棹謳過夫交烈火候吏次鳴騶梵塔形疑涌閭門勢欲
浮客迎携酒榼僧待置茶甌小宴閒談笑初筵雅獻酬
稍催朱炬蠟徐動碧牙籌圓盞飛蓮子長裾曳石榴柘

枝隨畫鼓調笑促香毬幕颺雲飄檻簾褰月露鉤舞繁
紅袖去歌切翠眉愁絃管寧容歇杯盤未許收良辰宜
酩酊卒歲好優游鰕鱖鮮仍細蓴絲滑且柔飽餐為日
計穩睡是身謀名愧空虛得官知止足休自嫌猶屑屑
衆笑大悠悠物表疎形役人衆足悔尤蛾須遠燈燭免
勿近且果幻世春來夢浮生水上漚百憂中莫入一醉
外何求未死癡王湛無兒老鄧攸蜀琴安膝上周易在
牀頭去去無程客行行不繫舟勞君頻問訊勸我少淹

留雲雨多分散關山奈阻脩一吟江月別七見日星周
珠玉傳新什鵷鸞念故儔懸旌心宛轉東楚意綢繆驛
舫妝青雀官槽秣紫騮鏡湖期遠汎禹穴約冥搜預拂
題詩壁先開望海樓飲思親履舄宿意並衾裯志氣吾
衰也風情子在不應須相見後別作一家遊

府西池北新葺水齋即事招賓偶題十六韻

繚繞府西面潺潺池北頭鑿開明月峽決破白蘋洲清
淺漪瀾急彘緣浦嶼幽直衝行逕斷平入卧齋流石疊

青稜玉波翻素片鷗噴時千點雨澄處一泓油絕境應
難別同心豈易求少逢人愛翫多是我淹留夾岼鋪長
簾當軒泊小舟枕前看鶴浴牀下見魚遊洞戶斜開扇
疎簾半上鉤紫浮萍泛泛碧亞竹脩脩讀罷書仍展棊
終局未收誰能伴老尹晨夕此間遊

村雪夜坐

南窓背燈坐風霰閣紛紛寂寞深村夜殘鴈雪中聞

友人夜訪

簷間清風簾松下明月杯幽意正如此况乃故人來

北亭獨宿

悄悄壁下牀紗籠耿殘燭夜半獨眠覺疑在僧房宿

招東隣

小榼二升酒新簾六尺牀能來夜話否池畔欲秋涼

出關路

山川函谷路塵上遊子顏蕭條去國意秋風生故關

夜雨

早蛩啼復歇殘燈滅又明
隔窓知夜雨芭蕉先有聲

江樓聞砧

江南授衣晚十月始聞砧
一夕高樓月萬里故園心

宿東林寺

經窓燈焰短僧爐火氣深
索落廬山夜風雪卧東林

夜雪

已訝衾枕冷復見窓戶明
夜深知雪重時聞折竹聲

除夜宿洛州

家寄關西住身為河北遊蕭條歲除夜旅泊在洺州

雨中題衰柳

濕屈青條折寒飄黃葉多不知秋雨意更遣欲如何

庾樓新歲

歲時銷旅貌風景觸鄉愁牢落江湖意新年上庾樓

遺愛寺

弄日臨溪坐尋花遶寺行時時聞鳥語處處是泉聲

閨怨

朝憎鶯百轉夜妬燕雙栖不慣經春別惟知到曉啼

池客

池晚蓮芳謝窓秋竹意深更無人作伴惟對一張琴

早秋獨夜

井梧涼葉動隣杵秋聲發獨向簷下眠覺來半牀月

宿桐廬館同崔存度醉後作

江海漂漂共旅遊一樽相勸散窮愁夜深醒後愁還在

雨滴梧桐山館秋

題李十一東亭

相思夕上松臺立
蛩思蟬聲滿耳
秋惆悵東亭風月好
主人今夜在鄜州

同李十一醉憶元九

花時同醉破春愁
醉折花枝作酒籌
忽憶故人天際去
計程今日到梁州

杏花園落時招錢員外同醉

花園欲去去應遲
正是風吹狼藉時
近西數樹猶堪醉

半落春風半在枝

村夜

霜草蒼蒼蟲切切
村南村北行人絕
獨出門前望野田
月明蕎麥花如雪

聞蟲

閤蟲唧唧夜絲絲
況是秋陰欲雨天
猶恐愁人暫得睡
聲聲移近卧牀前

燕子樓三首

并序

徐州故尚書張有愛妓曰盼盼善歌舞雅多風態
余為校書郎時遊徐泗間張尚書宴余酒酣出盼
盼以佐歡歡甚余因贈詩云醉嬌勝不得風媚牡
丹花盡歡而去邇後絕不相聞迨茲僅一紀矣昨
日司勳員外郎張仲素續之訪余因吟新詩有燕
子樓三首詞甚婉麗詰其由為盼盼作也續之從
事武寧軍累年頗知盼盼始末云尚書既沒歸葬
東洛而彭城有張氏舊第第中有小樓名燕子盼

盼念舊愛而不嫁居是樓十餘年幽獨塊然于今
尚在余愛績之新詠感彭城舊遊因同其題作三

絕句

滿窓明月滿簾霜被冷燈殘拂卧牀燕子樓中霜月夜
秋來只為一人長

鈿暈羅衫色似煙幾回欲著即潛然自從不舞霓裳曲
疊在空箱十二年

今春有客洛陽回曾到尚書墓上來見說白楊堪作柱

爭教紅粉不成灰

浦中夜泊

閣上江隄還獨立
水風霜氣夜稜稜
回看深浦停舟處
蘆荻花中一點燈

望江州

江迴望見雙華表
知是潯陽西郭門
猶去孤舟三四里
水煙沙雨欲黃昏

宿西林寺

木落天晴山翠開
愛山騎馬入山來
心知不及柴桑令
一宿西林便欲回

題廬山山下湯泉

一眼湯泉流向東
浸泥澆草煖無功
驪山溫水因何事
流入金鋪玉甃中

大林寺桃花

人間四月芳菲盡
山寺桃花始盛開
長恨春歸無覓處
那知轉入此中來

傷春詞

深淺簷花十萬枝
碧紗窗外轉黃鸝
殘妝含淚下簾坐
盡日傷春春不知

後宮詞二首

淚濕羅巾夢不成
夜深前殿按歌聲
紅顏未老恩先斷
斜倚薰籠坐到明

雨露由來一點恩
爭能徧布及千門
三千宮女顰脂面
幾箇春來不淚痕

青門柳

青青一樹傷心色曾入幾人離恨中為近都門多送別
長條折盡減春風

梨園弟子

白頭垂淚語梨園五十年前雨露恩莫問華清今日事
滿山紅葉鎖宮門

思婦眉

春風搖蕩自東來折盡櫻桃綻盡梅惟餘思婦愁眉結

無限春風吹不開

空閨怨

寒山沈沈洞房靜
真珠簾外梧桐影
秋霜欲下手先知
燈底裁縫剪刀冷

秋房夜

雲露青天月漏光
中庭立久却歸房
水窓夕冷未能卧
挑盡殘燈秋夜長

採蓮曲

菱葉紫波荷颭風荷花深處小船通逢郎欲語低頭笑
碧玉搔頭落水中

隣女

娉婷十五勝天仙白日姮娥旱地蓮何處閒教鸚鵡語
碧紗窓下繡牀前

閨婦

斜凭繡窓愁不動紅綃帶緩綠鬟低遼陽春盡無消息
夜合花前日又西

龍門下作

龍門澗下濯塵纓擬作閒人過此生筋力不將他處用
登山涉水詠詩行

曲江有感

曲江西岼又春風萬樹花前一老翁遇酒逢花還且醉
若論惆悵事何窮

杏園花下贈劉郎中

怪君把酒偏惆悵曾是貞元花下人自別花來多少事


東風二十四回春

題西亭

多少朱門富貴人
林園未畢即無身
我今幸作西亭主
已見池塘五度春

五年大病後獨宿香山寺

經年不到龍門寺
今夜何人知我情
還向暢師房裏宿
新秋月色舊灘聲



石倉歷代詩選卷六十一